

Жат ағымдар – жастардың жауы

Қай қоғамның болмасын негізгі тірегі жастар екені белгілі. Елбасы Н.Назарбаев барлық Жолдауларында осы жастар мәселесін назардан тыс қалдырған емес. Өйткені, қай елдің де болашағы жастардың қолында. Аләсемін деген ел өскелең ұрпағының келешегіне немқұрайды қарамайды.

Еліміз тәуелсіздік алған алғашқы сәттен-ақ жастарға көңіл бөлудей-ақ бөліп келеді. Алайда ел болған соң оның естісі мен есері, телісі мен тентегі, көргендісі мен көргенсізі, т.с.с. бір-біріне сондай кереғар таным-түсініктегі жастардың қатары қылаң беріп қалатыны бар. Жастарымыздың имандылыққа бет бұрғандығын малданып, малақайымызды аспанға атқанымызбен,

жарқырағанның бәрі алтын еместігін айыра алмаған қаракөздеріміздің күн жарықтың өзінде жаттың арбауына, бөтеннің бұғауына түсіп жатқанын жасыра алмаймыз. Шындығында бұл жастарымыздың әлеуметтік жағдайының анағұрлым төмендеуінен, рухани ішкі күйзелісінің артуынан, елде жоққа еліктегіштігінен, ұлттық құндылықтардан ажырап қалуынан, қағынан жеріген құландай өз қазағына шекесінен қарауынан туындап отырған факторлар емес пе екен?! Мұрты енді ғана тебіндеп, жасы жиырмаға жетіп жығылмаса да, кәдімгідей көлгірсіп, дін ілімінен өзінше өзгеше әңгіме тарқатып, өзімбілермендікке салынған дүмше дүмбілездеріміз аз ба еді?! Ұлттық кескін-келбетінен басыбүтін баз кешіп, таңертеңнен кешке шейін тұла бойын тұмшалап алып, үйде де, түзде де, тіпті білім ошақтарында да хиджабын тастамайтын әпке-қарындастарымыздың қарасы неге көбейіп барады?! Ал өзіміз құралпы кейбір замандастарымыздың, қала берді аға-інілеріміздің балағын шолттып, белуарына дейін сақалын шұбатып, көп ішінде көзге шыққан сүйелдей көрініп жүргені несі?! Міне, осының барлығы діни сауаттылығымыздың жоқтығынан, ақ-қараның аражігін ажырата алмауымыздан, бала тәрбиесін бетімен жіберген берекесіздігімізден. Сондықтан да, жастарымыз мейлінше шоғырланған Шымкент қаласындағы білім беру мекемелерінде діни

сауықтыру шараларын тездетіп қолға алып, оны пәрменді етуді ойластырғанымыз жөн.

Осы орайда Шымкент қаласында атқарылып жатқан игі шаралар аз емес. Жалпы орта мектептер мен арнаулы, жоғары оқу орындарында «Дінтану негіздері» пәні оқытылып келе жатқандығын, діни орталықтардың ұдайы жұмыс жүргізіп отырғандығын айтуға болады. Бұл тұрғыда біздің М.Әуезов атындағы ОҚМУ жанындағы Дінтану зерттеулер орталығының да еңбегі жеміссіз деп айта алмаймыз. Орталықтың қала аумағында ауқымды жұмыстардың атқарылуына белсенді қатысқанын айтуымызға болады.

Дінтану зерттеулер орталығы тәрбие және қоғамдық жұмыстарды

жолға қойып, жастарға діни экстремизм мен терроризмнің, кереғар жат ағымдардың өзекті мәселелерін түсіндірумен қатар, ең бастысы, Елбасының барлық Жолдауларын, әрі мемлекеттік саясатты және идеологияны насихаттау бағыттарында айтарлықтай шараларды жүзеге асырып келеді. Мәселен, биылғы оқу жылында ғылыми-зерттеу, оқу-әдістемелік жұмыстардың аясында 2 монография, 28 ғылыми мақала, 6 оқу-әдістемелік құрал жарық көріп, халықаралық және республикалық деңгейдегі 8 ғылыми конференция өткізілді. Ал, оқу орнымыздағы жастардың діни сауаттылығын арттыру мақсатында биылдың өзінде университеттік, облыстық, қалалалық деңгейде 55 лекция оқылып, 15 түрлі кездесулер, 5 пікірталас, 4 рет дөңгелек үстел отырысы өткізілсе, 20 рет теледидар арқылы насихат жұмыстары жасалды.

Дінтану зерттеулер орталығының оқу орнында оқитын жастардың сауаттылығын арттырып, тәлім-тәрбие беруде өлшеусіз үлес қосып отырғаны анық. Алдағы уақытта да өз жұмысын бұдан да жандандыра түсетіні сөзсіз.

Б.МҰСТАФАЕВ,
М.Әуезов атындағы ОҚМУ-дың
Тәрбие ісі және жастар саясаты
департаментінің басшысы

